



Reglur um þjónustu frístundaheimila Sveitarfélagsins Árborgar

Gildissvið

Reglur þessar gilda um umgjörð, umsóknir og innritun á frístundaheimili í Sveitarfélaginu Árborg að vetri og sumri og um gjaldtöku og innheimtu fyrir dvöl á frístundaheimilum sveitarfélagsins. Foreldri er hér notað yfir þá sem fara með forsjá barns skv. barnalögum.

Almennt um frístundaheimili

Sveitarfélagið Árborg starfrækir frístundaheimili fyrir börn í 1.-4. bekk í grunnskólum sveitarfélagsins og eru þau fjögur talsins. Á heimasíðu sveitarfélagsins, www.arborg.is, er að finna ítarlegri upplýsingar um frístundaheimili sveitarfélagsins. Frístundaheimili í Árborg starfa samkvæmt gæðaviðmiðum um starfsemi frístundaheimila sem sett eru af mennta- og barnamálaráðuneyti og þeim reglum sem bæjarstjórn Árborgar hefur sett um þjónustu frístundaheimila í Sveitarfélaginu Árborg.

1. Innritun – afgreiðslutími

1.a Innritun

Á veturna bjóða frístundaheimilin upp á fjölbreytt frístundastarf þegar hefðbundnum skóladegi lýkur, en þá geta börn eingöngu verið skráð á frístundaheimili sem er starfrækt við þann grunnskóla sem þau eru í.

Skráning í starf frístundaheimilanna fer fram á vef Sv. Árborgar í gegnum vefumsjónarkerfi **Völu**. Hægt er að fá aðstoð við að fylla út rafræna umsókn um dvöl á frístundaheimili í öllum frístundaheimilum sveitarfélagsins sem og í þjónustuveri Sv. Árborgar sem er að finna í Ráðhúsinu, Selfossi, Austurvegi 2, sími: 480-1900.

Í *febrúar* ár hvert opnar fyrir skráningu fyrir komandi vetur og er miðað við að foreldrar sækja um fyrir 1. júní ár hvert fyrir komandi skólaár. Foreldrar barna sem eru með lögheimili í Sv. Árborg og eru að fara í 1. - 4. bekk næsta skólaár fá sent bréf þessa efnis í febrúar í tölvupósti. Áður en sótt er um dvöl á frístundaheimili þurfa börnin að vera skráð rafrænt í viðkomandi grunnskóla.

Gert er ráð fyrir að öll börn sem búið er að sækja um dvöl fyrir á frístundaheimili fái pláss á yfirstandandi skólaári en upphaf dvalar getur tafist þar til ráðið hefur verið í stöður frístundaleiðbeinenda. Í slíkum tilvikum er fyrst litið til forgangshópa og síðan tímasetning skráningar. Sjá sjá nánar 4. gr. um forgang á frístundaheimili.

Þegar sótt hefur verið um dvöl á frístundaheimili fá foreldrar staðfestingu um að umsókn hafi verið móttækin. Umsóknir barna eru samþykktar samkvæmt reglum sveitarfélagsins, sjá gr. 4 um forgang í vetrarstarfið. Við umsókn skal taka fram ef um ofnæmi eða óþol er að ræða og mikilvægt að skila staðfestingu frá lækni með umsókninni samkvæmt reglum sveitarfélagsins.

Eftir að forstöðumaður hefur sent boð um vistun barns þarf foreldri að staðfesta boðið svo barnið geti hafið vistun á frístundaheimilinu.

Skráning í sumarstarf hefst í apríl. Skrá þarf barn fyrir kl. 12:00 á þriðjudegi til að barn geti hafið dvöl á mánudegi í vikunni á eftir. Sjá nánar um börn með stuðningsþarfir, sbr. 9 gr.

1.b Opnunartími, skipulagsdagar og sumarleyfi frístundaheimila

Almennur opnunartími frístundaheimilanna er kl. 13:00 til kl. 16:15.

Skóladagatal grunnskóla er grundvöllur að samstarfi grunnskóla og frístundaheimilis um þá þjónustu sem börn í 1.-4. bekk og foreldrar þeirra njóta. Á frístundadagatali koma fram allir frídagar og aðrir uppbrotisdagar.

Um frídaga og aðra uppbrotisdaga gildir eftirfarandi:

- a. Á foreldraviðtalsdögum stendur þjónusta frístundaheimila til boða frá kl. 8:00 – 16:15. Einnig er opið í jólafríi fram að jólum. Óskað er eftir skráningu á þessa daga sérstaklega á hverjum stað fyrir sig.
- b. Á óhefðbundnum skóladögum þar sem kennsla fellur niður að hluta, hefst frístundaheimilið á hefðbundnum tíma nema um annað sé samið og að af því stafi ekki kostnaðarauki fyrir frístundaheimili. Óhefðbundnir skóladagar geta verið að hámarki 10 dagar yfir skólaárið. Þetta geta verið t.d. íþróttar- og útivistardagar, sérstakir þemadagar, jólaskemmtanir, námsmats- eða prófdagar og vorferðadagar.
- c. Frístundaheimilin eru lokað í haust- og vetrarfríum grunnskólanna sem og í dymbilvikum og á milli jóla og nýárs.
- d. Frístundaheimilin eru opin á skólasetningar- og skólaslitadögum frá kl. 8:00 – 16:15 og er um skráningardaga að ræða.
- e. Starfsdagar/skipulagsdagar frístundaheimila eru fjórir á skólaárinu, að jafnaði tveir á haustönn og tveir á vorönn. Þessa daga er ekki tekið á móti börnum.

Ofantaldir frídagar á frístundaheimilum, uppbrotisdagar og óhefðbundnir skóladagar hafa ekki áhrif á gjaldtöku fyrir utan það að aukagjald er tekið fyrir þjónustu á skráningardögum (liður a hér að ofan).

Á sumrin er boðið upp á sumarstarf frá kl. 9:00-16:15 mánudaga til fimmtudag, en hægt er að kaupa viðbótarstund frá kl. 8:00-9:00 sem greitt er fyrir sérstaklega. Á föstudögum er opið frá kl. 08:00-14:00. Sérstök gjaldskrá gildir fyrir sumarstarf frístundaheimila. Öll frístundaheimilin í Árborg bjóða upp á sumarstarf í upphafi sumars en mögulega munu þau sameinast í nokkrar vikur yfir hásumarið sem miðast við skráningu. Sú meginregla gildir þar að hvert barn skal fá fjögurra vikna samfleytt sumarfrí hið minnsta en þó er hægt að sækja um undanþágu frá þeirri reglu. Það á við um sérstakar aðstæður þegar saman fer að þjónustuþörf er mikil, vandi samþættur og mikið álag í félagsumhverfi barnsins. Lokað er í fjórar vikur samfleytt í lok júlí og byrjun ágúst.

2. Skilyrði fyrir dvöl á frístundaheimili

Skilyrði fyrir dvöl barna á frístundaheimilum yfir vetur er að barnið sé nemandi í grunnskóla þar sem frístundaheimilið er rekið og að foreldrar barnsins séu ekki í vanskilum við

sveitarfélagið vegna dvalar barns/barna þeirra á frístundaheimili (sjá kafla 7.b). Ef foreldrar búa ekki saman en fara sameiginlega með forsjá barns getur það foreldri sem barn á lögheimili hjá sótt um frístundaheimili.

Sé barn með lögheimili í öðru sveitarfélagi en Sv. Árborg þarf samþykki viðkomandi sveitarfélags fyrir kostnaðarþátttöku vegna dvalar á frístundaheimili að liggja fyrir áður en dvöl hefst.

3. Flutningur milli frístundaheimila

Ef barn á frístundaheimili flyst milli skóla í Sv. Árborgar er hægt að færa umsókn um frístundaheimili á milli þeirra. Umsóknir raðast í rétta tímaröð og eru afgreiddar samkvæmt því, elsta umsóknin fyrst, sjá þó gr. 4 um forgang.

4. Forgangur á frístundaheimili

Umsóknir um dvöl á frístundaheimili eru afgreiddar í tímaröð, en þó þannig að börnum í 1. bekk er fyrst boðin dvöl, þá börnum í 2. bekk og svo koll af kolli. Jafnframt er börnum veittur forgangur vegna fötlunar eða langvarandi veikinda þurfa á sértækum stuðningi að halda og eru skilgreind í umönnunarflokki 1, 2 eða 3 samkvæmt skilgreiningu [Tryggingarstofnunar](#) ríkisins.

Að auki er hægt að sækja um forgang skriflega til forstöðumanns viðkomandi frístundaheimilis vegna:

- a) **barna sem þurfa forgang vegna fötlunar.** Þroskajálfi frístundaheimilanna ber ábyrgð á afgreiðslu umsókna vegna barna sem njóta forgangs vegna fötlunar. Staðfesting frá *viðurkenndum greiningaraðila og/eða frá félagsþjónustu* skal fylgja umsókn.
- b) **barna sem þurfa forgang vegna félagslegra aðstæðna.** Starfsmenn félagsþjónustu, barnaverndar eða annarra stofnana sem koma að málefnum barna og námsráðgjafar eða deildarstjórar yngsta stigs í viðkomandi grunnskóla geta sótt um forgang vegna félagslegra aðstæðna eða skyndilegra breytingar á fjölskylduhögum.
- c) **barna sem hafa búið skemur en tvö ár á Íslandi.**

Umsóknir um forgang skulu afgreiddar eins fljótt og auðið er. Þegar umsókn um forgang hefur verið samþykkt fær barn pláss á frístundaheimilinu um leið og aðstæður leyfa.

Ekki er veittur forgangur í sumarstarf frístundaheimila.

5. Úthlutun pláss, dvalarsamningur og uppsögn

Úthlutun pláss á frístundaheimili fer einkum fram í ágúst en æskilegt er að umsóknir berist fyrir 1. júní ár hvert. Foreldrar fá staðfestingu í gegnum vefumsjónarkerfi **Völu** þegar barn þeirra hefur fengið pláss á frístundaheimili. Foreldrar þurfa að staðfesta það boð svo vistun geti hafist. Forsenda fyrir að barn geti hafið vistun á frístundaheimili er að foreldri sitji samráðsfund með stjórnanda frístundaheimilis áður en vistun hefst.

Áður en dvöl barns á frístundaheimili hefst gerir viðkomandi frístundaheimili og foreldrar með sér dvalarsamning í gegnum vefumsjónarkerfi **Völu**. Ef óskað er eftir að annar en umsækjandi sé skráður greiðandi þarf sá aðili að óska eftir því skriflega hjá *forstöðumanni viðkomandi frístundaheimilis*.

Með undirritun sinni eða staðfestingu í rafrænni umsókn staðfesta foreldrar að þeir hafi kynnt sér gjaldskrá fyrir frístundaheimilin og reglur um þjónustu frístundaheimila og skuldbinda sig til þess að hlíta þeim eins og þær eru á hverjum tíma.

Gagnkvæmur uppsagnarfrestur er tvær vikur og miðast við 20. hvers mánaðar. Tekur uppsögnin gildi um næstu mánaðamót. Uppsögn skal í öllum tilfellum fara fram á rafrænu formi í gegnum vefumsjónarkerfi **Völu**.

Hið sama gildir um breytingar á dvalarsamningi. Allar breytingar foreldra þarf að skrá í gegnum vefumsjónarkerfi **Völu** fyrir 20. hvers mánaðar.

5.1 Sumarstarf frístundaheimila

Umsóknir vegna sumarstarfsins eru afgreiddar í þeirri tímaröð sem þær berast. Sumarstarfið er fyrir öll börn sem eru að hefja nám í 2.-5. bekk um haustið. Börn sem eru að fara að hefja nám í 1. bekk geta tekið þátt í sumarstarfi frístundaheimila, á svokölluðu aðlögunarnámskeiði, í allt að tvær vikur í ágúst fyrir skólabyrjun.

6. Gjaldtaka

Gjaldtaka fyrir starf frístundaheimila

Gjald fyrir þjónustu frístundaheimila og fyrir síðdegishressingu á hverjum tíma er samkvæmt gjaldskrá Sveitarfélagsins Árborgar eins og hún er birt á heimasíðu sveitarfélagsins, www.arborg.is.

Gjaldskráin er samþykkt af bæjarstjórn og getur breyst án fyrirvara.

Sveitarfélagið Árborg greiðir hluta kostnaðar við dvöl barna á frístundaheimilum sveitarfélagsins. Foreldrar greiða hluta kostnaðar í hlutfalli við þá daga sem börn þeirra dvelja á frístundaheimilum. Einnig greiða foreldrar kostnað við síðdegishressingu.

Ef þjónusta er nýtt kl. 8:00 - 13:00 á foreldradögum og starfsdögum skóla eða í jólafríi sbr. gr. 1.b og þarf að greiða fyrir það sérstaklega. Skráning í skráningadaga er bindandi. Hádegismatur og síðdegishressing er í boði þessa daga en börnin þurfa að koma með nesti fyrir fyrri part dagsins sbr. upplýsingar frá starfsstað hverju sinni.

Ef tvö systkini eða fleiri dvelja á frístundaheimili, leikskóla eða hjá dagforeldri er veittur 50% afsláttur af dvalargjaldi vegna annars barns, 75% vegna þriðja barns og 100 % vegna fjórða barns. Foreldrar eru ábyrgir fyrir því að skrá systkini á umsóknarblað á Völu vegna systkinaafsláttar. Foreldrar greiða fyrir síðdegishressingu allra barnanna.

6.b Gjaldtaka í sumarstarfi

Gjald fyrir þjónustu í sumarstarfi frístundaheimila er samkvæmt gjaldskrá eins og hún er birt á hverjum tíma á vefsíðu sveitarfélagsins. Í sumarstarfi frístundaheimila er greitt grunngjald frá kl. 09:00-16:15. Greitt sérstaklega fyrir tímann frá kl. 08:00-9:00. Taka ber fram að á

föstudögum er opnunartíminn 08:00-14:00. Ekki er boðið upp á hressingu í sumarstarfinu nema annað sé tekið fram og þurfa börnin því að taka með sér þrjú nesti að heiman. Ef skráður þátttakandi hættir við þátttöku í sumarstarfinu, en hefur ekki afskráð viðkomandi í gegnum umsjónarkerfi Völu að minnsta kosti þriðjudeginum fyrir upphaf námskeiðs, þá er námskeiðsgjald innheimt að fullu. Ef veikindi hamla þátttöku barns í sumarstarfi er námskeiðsgjald felld niður gegn framvísun læknisvottorðs til stjórnenda sumarstarfs frístundaheimila. Veittur er 25% systkinaafsláttur af eldri börnum í sumarstarfi. Einnig er hægt að nýta frístundastyrk sveitarfélagsins til að greiða fyrir námskeið.

7. Innheimta dvalargjalda, vanskil og uppsögn dvalarsamnings

Unnt er að greiða dvalargjöld með beingreiðslum, kreditkorti eða fá senda greiðsluseðla. Ef greiðandi vill fá senda greiðsluseðla þarf hann að hafa samband við þjónustuver Sv. Árborgar, Austurvegi 2, sími: 480 1900. Ef óskað er eftir að fá greiðsluseðla þarf að senda eða færa gjaldið beint á kort, að öðrum kosti birtist greiðsluseðill einungis í heimabanka. Ef greiðandi vill greiða með beingreiðslum þarf hann að hafa samband við viðskiptabanka sinn.

Gjald fyrir dvöl á frístundaheimili og í sumarstarfi er innheimt eftir á. Gjaldldagi er 1. hvers mánaðar og eindagi 20 dögum síðar. Skráning á skráningadaga á frístundaheimili er bindandi og er gjald fyrir slíka skráningu innheimt eftir á.

7.a Innheimtuferli vegna vanskila

Innheimtuferli vegna vanskila er samkvæmt innheimtureglum Sv. Árborgar.

Séu dvalargjöld enn ógreidd tíu dögum eftir eindaga fær greiðandi senda innheimtuviðvörðun frá banka.

Hafi krafa ekki verið greidd 30 dögum eftir eindaga er sent milliinnheimtubréf frá banka.

Krafa sem ekki innheimtist í banka fer í milliinnheimtu 120 dögum frá gjaldldaga.

Auk dráttarvaxta sem reiknast af höfuðstóli kröfu frá gjaldldaga fram að greiðsludegi, sé krafa greidd eftir eindaga, bætist við kostnaður við innheimtu og útsendingu ítrekunarbréfa á greiðanda.

7.b Uppsögn dvalarsamnings

Uppsögn á dvöl og fækkun daga á frístundaheimili þarf að berast fyrir 20. hvers mánaðar og tekur hún þá gildi um næstu mánaðamót. Umsókn um fjölgun daga getur farið fram hvenær sem er og tekur gildi um leið og mönnun er fullnægjandi. Uppsögn og breytingar á dvalarsamningum skulu fara fram í gegnum vefumsjónarkerfi Völu.

Hafi greiðsla dvalargjalda ekki borist 110 dögum frá gjaldldaga áskilur sveitarfélagið sér rétt til þess að segja upp dvalarsamningi vegna dvalar á frístundaheimili. Uppsögn miðast við mánaðamót og er uppsagnarfrestur einn mánuður.

Sveitarfélaginu er heimilt að gera samkomulag við foreldra um eldri skuldir á dvalargjöldum svo að yngra barn þeirra geti hafið dvöl á frístundaheimili en í því felst m.a. að sveitarfélaginu er heimilt að segja upp dvöl yngra barns, sé ekki staðið við samkomulag um greiðslu.

Fylgt er verklagi um aukna þjónustu til foreldra sem skulda, þar sem starfsfólk beinir foreldrum í ráðgjöf vegna skulda sinna.

Í sumarstarfi frístundaheimila þarf að afskrá barn í gegnum vefumsjónarkerfi Völu eigi síðar en kl. 12:00 á þriðjudegi áður en námskeið hefst, hið minnsta. Ella verður námskeiðsgjald innheimt að fullu.

8. Veikindi barns

Geti barn ekki sótt frístundaheimili vegna veikinda í fjórar vikur samfelldt eða lengur geta foreldrar sótt um allt að 50% afslátt af dvalargjöldum. Afsláttur er veittur fyrir þann tíma er veikindi vara gegn framvísun læknisvottorðs sem staðfestir að barnið hafi ekki getað sótt frístundaheimili. Sækja verður um afsláttinn innan þriggja mánaða frá því að veikindum lýkur. Foreldrar bera ábyrgð á því að upplýsa viðkomandi frístundaheimili um að barnið hafi hafið dvöl á frístundaheimilinu að nýju eftir veikindi. Sveitarfélagið Árborg áskilur sér rétt til þess að innheimta gjöld afturvirkkt komi í ljós að ekki hafi verið greitt fullt gjald eftir að barn hóf dvöl á frístundaheimili að nýju.

Í sumarstarfi frístundaheimila eru ekki felld niður dvalargjöld vegna veikinda nema gegn framvísun læknisvottorðs til frístundaheimilis.

9. Stuðningur

Börn sem þurfa á sértækum stuðningi að halda fá stuðning á frístundaheimilum að undangenginni samþykkt þroskaþjálfra frístundaheimila.

Ef börn sem eru með lögheimili í öðrum sveitarfélögum og þurfa á sérstökum stuðningi að halda og dvelja á frístundaheimilum í Sv. Árborg, greiðir viðkomandi sveitarfélag framlag með barninu samkvæmt samningi þar um.

10. Húsnæði frístundaheimila

Frístundaheimili skulu alla jafna vera staðsett í eða við grunnskóla Árborgar.

Rekstrarkostnaður, s.s. viðhald, ræsting og rekstur aðgangskerfa, er á ábyrgð skólastjóra þar sem það á við. Umsjónarmenn fasteigna (húsverðir) skólanna annast vörslu húsnæðisins þar sem frístundaheimili er staðsett í húsnæði grunnskóla. Sérstaklega skal áætla fjármagn árlega til efnis- og tækjakaupa fyrir hvert frístundaheimili.

Þar sem aðstaða fyrir frístundaheimili er ekki fullnægjandi innan grunnskóla skal sveitarfélagið útvega húsnæði í samræmi við skilgreiningu á rýmisþörfum frístundaheimila í byggingarreglugerð. Lagt er upp með að hvert frístundaheimili eigi sitt „hjarta“ eða heimasvæði sem almennt er ekki nýtt undir aðra starfsemi. Samnýting sé þó eðlileg á öðru húsnæði með skóla, íþróttahúsi og o.fl.

11. Samstarf

Tryggja þarf samstarf og samráð frístundaheimilis og viðkomandi grunnskóla. Stjórnendur skólans kynna að vori skóladagatal komandi vetrar fyrir forstöðumanni frístundaheimilis og forstöðumaður kynnir starfsemi frístundaheimilis fyrir stjórnendum skólans.

Gagnkvæmt upplýsingastreymi skal vera á milli grunnskóla og frístundaheimilis með reglulegum fundum. Skóli veitir forstöðumanni frístundaaðgang í Mentor. Sá aðgangur er notaður til að kynna starfsemi frístundaheimilis og annað frístundastarf í viðkomandi hverfi fyrir foreldrum með tölvupósti.

Forstöðumaður er kallaður inn á nemendaverndarráðsfundi (í samræmi við 20. grein í Reglugerð um skólaþjónustu sveitarfélaga við leik- og grunnskóla og nemendaverndarráð í grunnskólum), teymisfundi vegna 6-9 ára barna sem eiga rétt á þjónustu viðkomandi frístundaheimilis og aðra samstarfsfundi eins og þurfa þykir.

Forstöðumaður frístundaheimilis situr upplýsingafundi leik- og grunnskóla vegna 6 ára barna. Samstarf er við leikskólastjóra um að forstöðumaður sitji skilafund varðandi börn sem gætu þurft á stuðningi að halda á frístundaheimilinu. Þetta er gert til að tryggja samfellu í þjónustu við barnið.

Forstöðumaður vinnur í fagteymi með öðrum forstöðumönnum og fleirum. Einnig vinnur forstöðumaður náið með stjórnendum hvers grunnskóla.

Frístundaheimilin skulu leita eftir samstarfi við þá aðila sem sinna tómstundastarfi barna í sveitarfélaginu með það að markmiði að börnin geti stundað það innan tímaramma frístundaheimilanna.

12. Mannauður

Hver starfsmaður skal að jafnaði hafa umsjón með 13 börnum í 1.bekk og 16 börnum í 2.- 4. bekk. Til viðbótar koma starfsgildi vegna barna sem þurfa sértækan stuðning.

Skólar og frístundaheimili leitist við að eiga samvinnu um að ráða starfsfólk sem geta gegnt starfi í skóla sem og á frístundaheimili.

Stjórnendur frístundaheimila skulu hafa fagmenntun á sviði uppeldis- og/eða tómstunda- og félagsmálafræða eða aðra menntun sem nýtist í starfi. Æskilegt er að frístundaleiðbeinendur/stuðningsfulltrúar hafi menntun og/eða reynslu sem nýtist í starfi.

Undirbúningstími forstöðumanns skal vera að lágmarki tíu klukkustundir á viku og skal undirbúningstími sérfræðings/staðgengils vera að lágmarki fimm klukkustundir á viku og skal sá tími falla utan þjónustutíma frístundaheimilisins.

13. Gildistaka

Reglur þessar taka gildi frá og með 20. nóvember 2025

Æskilegt er að leggja mat á þessar reglur fyrir 1. október 2026 og endurskoða eftir þörfum.

Samþykkt í bæjarstjórn Árborgar 19. nóvember 2025